



Selasa, 11 Januari 2022
Ogen: Ezekiel 23:22-35



Kiniseran ulih perbahanen



Erbage-bage dalanna kita ngenanami kiniseran. Lit erkiteken Perbahanen, lit erkiteken pedahin, lit ka erkiteken alam. Genduari ercakup kita kerna kiniseran erkiteken perbahanen. Perbahanen e pe dua bentukna, perbahanen si mehuli ras si la mehuli. Erkiteken perbahanen si mehuli pe kita banci ngenanami kiniseran sabab lit nge kalak la senang nandangi si mehuli, ras si bujur. Tupung kita bujur terganggu akapna pendahinna, e maka iusahakenna ngelakoken si jahat man banta gelah ulanai kita erbahan bujur. Tentu e jadi kiniseran man banta. Tapi lit ka erkiteken perbahanennta si jahat nge maka kita ngenanami kiniseran, umpamana la teratur perpan ras perpedemta, turah me pinakit si erbahansa kita ngenanami kiniseran.

Renungenta wari enda pe nuriken kerna kiniseran erkiteken perbahanen si la mehuli. Oholiba si meriah kal akapna erlua-lua ras dilaki-dilaki bangsa si deban, seh maka nggalar pe ia nggit gelah dilaki e nggit medem ras ia. La kal akapna meherga dirina, apai ka kinitekenna. Perbahanen si bage rupana ciga kal ate Dibata. E maka ibahan Dibata nembeh atena nandangi dilaki-dilaki si pernah ras ia, lanai atena bage nandangi kalak e tapi la ndungi persoalen. Kerina dilaki-dilaki e ersada arih, erpekat ia ngelawan Oholiba, endeskenNa Oholiba ku bas tan dilaki-dilaki e. E maka rate-ate ia kerina, si mpeturah atena mesui.

Oholiba e simbol kerajaan Juda si la setia man Dibata, daramina bangsa-bangsa si deban si megegeh guna nampati ia tapi dungan bangsa-bangsa e kang si erpekat naluken kerajanna. La kal mehuli perbahanen si la setia nandangi Tuhan. La setia man Tuhan teridah i bas la setia nandangi perbulangen. kelasetian e mpeturah kiniseran man banta jine, kiniseran man keluarga, kiniseran man jelma sienterem.

Tetap setia man perbulangen ras man Tuhan.

